

新脩麻陽縣志 第 函

新脩麻陽縣志

卷一

序

新修麻陽縣志卷之八

人物志

詞美靈均典羅左史况蒼梧紀古皇之蹟瀟湘傳帝
子之音維楚有材自古爲昭麻陽地擷山川之秀人
多磊落之奇書傳循吏仰遺澤於懷忠錄紀名臣緬
高風於太僕其他懷真抱慤砥行立名或萃忠孝於
一門或昭節烈於千古或

皇路馳驅勲銘麟閣或名山著述幟樹騷壇或里黨而重
芳型或期頤而欽碩望要皆爲天地清淑所鍾經

國家薰陶而致他如禪參蓮社籍寄蓬壺與夫寓公遷
客名流方伎其人其事非無足紀所由選備楨榦足
令晃山而生色香分蘭芷長隨錦水以流芳

仕進

明

滿朝薦字震東麻陽人萬歷三十二年進士授咸甯
知縣有廉能聲稅監梁永縱其下劫諸生豪朝薦捕
治之永怒劾其擅刑稅役詔鐫職大學士沈鯉等
論救不聽會巡撫顧其志極論永貪殘狀乃復朝薦
官奪俸一歲無何永遣人蠱巡按御史余懋衡事覺
朝薦捕獲其人永懼率衆擐甲入縣庭吏卒早爲備
無所掠而去城中數夜警言永反或謂永宜自明永

遂下教自白不反狀然蓄甲者數百而朝薦助懋衡
操之急諸惡黨多亡去朝薦追之渭南頗有所格傷
永懼使使繫書髮中入都訟朝薦刼上供物殺數人
投屍河中帝震怒立遣使逮治時三十五年七月也
既至詔下獄榜掠遂長繫中外論救自大學士朱賡
以下百十疏最後四十一年秋萬壽節將屆因大學
士葉向高請乃與王邦才卞孔時並釋歸光宗立起
南京刑部郎中再遷尚寶卿天啓二年遼東地盡失
海內多故而廷臣方植黨逞浮議朝薦深慮之疏陳

時事十可憂七可怪語極危切尋進大僕少卿復上
疏曰比者風霾曠晦星月晝見太白經天四月雹六
月冰山東地震畿內霑潦天地之變極矣四川則奢
崇明叛貴州則安邦彥叛山東則徐鴻儒亂民人之
變極矣而朝廷政令乃顛倒日甚一乞骸耳周嘉謨
劉一燝顧命之元老以中讒去孫慎行守禮之宗伯
以封典去王紀執法如山之司寇以平反去皆漠不
顧惜獨惓惓於三十疏劾之沈灌卽去而猶加異數
焉祖宗朝有是顛倒乎一建言耳倪思輝朱欽相等

之削籍已重箝口之嗟周朝瑞惠世揚等之拂衣又
中一網之計祖宗朝有是顛倒乎一邊筴耳西都索
百萬之資邊臣猶慮其未飽健兒乞錙銖之餉度支
尙謂其過奢祖宗朝有是顛倒乎一棄城耳多年議
確之犯或以庇厚而緩求旬日矜疑之輩反以妬深
而苛督祖宗朝有是顛倒乎一緝姦耳正罪自有常
律平反原無濫條遼陽之禍起於袁應泰之大納降
人降人盡占居民婦女故遼民發憤招敵攻城事發
倉卒未聞有何人獻送之說也廣甯之變起於王化

貞之誤信西部取餉金以啖捕而不給卒伍以故人
心離散敵兵過河又不聞西部策應遂至手足無措
抱頭鼠竄亦事發倉卒未聞有何人獻送之說也深
求奸細不過爲化貞卸罪地耳王紀不欲殺人媚人
反致削籍祖宗朝有是顛倒乎若夫閣臣之職在三
持清議今章䟽有姤才壞政者非惟不斥也輕則兩可重則
竟行其言矣有姤奸報國者
非惟不納也輕則見
讓重則遞加黜罰矣尤有恨者沈灌賄盧受得進乃
受敗又交通跋扈之奄以樹威振瑾僨裂之禍皆灌
作俑而放流不加他若戚畹豈不當檢何至以閹寺

之讒斃其三僕二宮分有常尊何至以傾國之昵僭
逼母儀此皆顛倒之甚者也顧成於陛下者什之一
二成於當事大臣者什之八九臣誠不忍見神州陸
沉祈陛下終覽臣疏與閣部大臣更絃易轍悉軌祖
宗舊章臣卽從逢干於地下猶生之年旣奏魏忠賢
激帝怒降旨切責禡職爲民大學士葉向高申救甚
力帝不納已忠賢黨撰東林同志錄朝薦與焉竟不
復用崇禎二年薦起故官未就卒

莫宗文起家武畧天啓辛酉以功授黔巴香守備隨

遷都司歷陞總兵崇禎庚辰賜蟒玉進太子少保蔭
一子蘅壬午特進柱國太師再蔭一子英諸贈四代
封安化伯以名將著稱

楊亨洪武癸酉舉人授工部主事少負奇質涉獵經
史砥礪名節直不可撓清不可濁時以博雅廉謹稱
田豐景泰間貢嘉靖中令廣西天河縣擒右江刼蠻
卻那地州餽金捐俸遷建縣治中丞張烜記之尋以
才調江南廉介有聲蜀王爲製琴堂樹柏文以贈兩
任八載蕭然而歸不事請謁以詩書自娛者三十八

年壽八十有五子廷諭廷議俱登仕籍

曾貴衡景泰間貢知山西曲陽縣興學飭政歸里後
常施濟親故之貧乏者

滕高天順間貢官廣西桂林府檢校居恒以恭謹方
直自律出仕後果爲良吏

龍璿成化中由貢任廣東肇慶衛知事持身謹厚贊
畫有聲卒於官軍民慟之

黃芳宏治中由貢任六安州性和藹厚重寡言當官
以廉能稱事父母曲盡愛敬居喪哀毀幾絕內外稱

孝無間言

聶仲儒宏治間由貢生任江西高安縣主簿性簡靜
治事從容就理居鄉爲閭里所推重夫婦同享九十
餘齡雅稱偕老

李瑄正德間貢任浙江歸安縣丞風度藹然接人恒
粥粥自下遇事則剖決砉然

滕鳳正德間貢初令四川長壽縣後補江津操守清
嚴所在撫字有方尤加意學校卒於官兩邑搢紳士
民哀慕不已並輓以詩

路瓚正德間貢任江西新喻縣主簿性安詳履官一
以慈惠爲先

張才正德間貢嘉靖七年在四川郫縣知縣值大饑
詳請傾倉賑濟更勸富家出粟以襄荒政邑復大疫
徧給藥餌活者甚衆道有遺骼置義塚收瘞之又開
築陂堰以禦旱民甚德之

張明表才之子嘉靖間貢任雲南大理府通判文學
優贍才亦精敏治獄特著能聲家居恒有法度屬纊
時戒婦女不得侍側治喪勿用浮屠葢素不信鬼也

李榮嘉靖間貢知廣東崇善縣有廉介聲豪猾讐服
尤敦氣誼不汨名譽古之遺直誠不多讓

田仲賓嘉靖間貢任江西龍泉縣丞渾厚無町畦治
才亦綜練有體尤富於學比歸朱縣令子孟震何縣
尉子文極執經請業後俱登第

龍珊嘉靖間貢風甘澹泊及官四川叙州府經歷益
謹畏不營一私

張一貫嘉靖間貢知南直贛榆縣廉明有爲不撓於
勢後改四川成都府教授

滕霄嘉靖間貢居家孝友三世同炊家人無間言官
江西吉安府經歷尤參畫盡職

羅欽道嘉靖間貢授雲南南甯縣尹剛毅質實博學
多才允推良吏

劉潔嘉靖間貢授廣西南甯縣推官有冤獄廉得其
情而平反之能聲著嶺徼間考最擢廣東崖州知州
田成性嘉靖間貢官雲南定遠縣令釐剔弊政胥吏
不敢爲奸繩土官以禮法威信爲蠻獠所懾後擢知
祿勸州

田廷諭豐長子嘉靖間貢任廣東廉州府推官制行
剛方篤於孝友遇苗叛三弟廷試被擄父母廢食與
弟廷議入苗巢贖弟以還官俸皆分給諸弟年七十
餘跌坐而逝

黃大庭萬厯三十六年由監生除授河南歸德府經
厯治河有功在任九年歸民尸祝之

龍德新崇禎間任江西吉安府廬陵縣新安富田司
巡檢愛民禮士卒於官祠祀之

國朝